

善住意天子所問經卷上

裳七

元魏三藏毗目智仙共流支等譯

歸命一切諸佛菩薩

歸命世尊大智慧海

毗盧遮那釋迦牟尼佛法光明

歸命聖者文殊師利大菩薩海

歸命聖者善住意天子遍行大乘者

如是我聞一時婆伽婆住王舍城耆闍崛山

中與大比丘衆六萬二千人俱皆是智者之

所識知一切悉是大阿羅漢諸菩薩摩訶薩

四萬二千人其名曰文殊師利菩薩師子幢

菩薩彌勒菩薩觀世自在菩薩得大勢菩薩

辯聚菩薩持地菩薩彌樓山菩薩彌樓幢菩

薩不動搖菩薩善思義菩薩善思惟菩薩勇

猛意菩薩慧心菩薩善心菩薩摩尼聚菩薩

山相擊王菩薩寶手菩薩寶意菩薩寶印手

菩薩常舒手菩薩常縮手菩薩常精進菩薩

度衆生菩薩增上精進菩薩如說能行菩薩

精進願菩薩手燈菩薩等心菩薩捨罪菩薩

除諸暗菩薩力不壞菩薩日藏菩薩金剛遊

步菩薩無邊遊步菩薩無量遊步菩薩不動
 足遊步菩薩虛空庫菩薩上意菩薩勝意菩
 薩增上意菩薩吉行菩薩持地住菩薩月光
 菩薩月幢菩薩光幢菩薩光德菩薩遊步到
 明菩薩師子遊步雷音菩薩無礙辯菩薩相
 應辯菩薩捷疾辯菩薩最勝菩薩蔽日月光
 菩薩無攀緣菩薩無比菩薩根常喜笑菩薩
 障一切罪菩薩捨女飾菩薩摩尼那菩薩光
 明菩薩淨滿菩薩得大菩薩集光王菩薩深
 吼菩薩如是等上首菩薩摩訶薩四萬二千

人俱爾時復有四大神王天帝釋王娑婆世
 界主大梵天王如是等上首六萬天子俱復
 有七萬三千天子善住意天子善寂天子摩
 醯首羅天子而為上首皆樂修行菩薩之道
 復有二萬阿脩羅王羅睺阿脩羅王彌樓阿
 脩羅王而為上首皆樂修行菩薩之道復有
 六萬龍王名不苦惱龍王名月龍王名得叉
 迦龍王而為上首皆樂修行菩薩之道如是
 復有無量百千天龍夜叉乾闥婆阿脩羅迦
 樓羅緊那羅摩睺羅伽人與非人諸大眾俱

卷七

二

比丘比丘尼優婆塞優婆夷皆悉來集爾時
世尊無量百千眷屬圍繞恭敬尊重而為說
法爾時文殊師利童子於自寺住獨坐思惟
心靜三昧正念觀察正觀察已起彼三昧起
三昧已復入三昧以三昧力六種震動十方
無量不可計數阿僧祇耶不可思議恒河沙
等諸佛世界爾時文殊師利童子起彼三昧
如法思惟生如是心佛出世難人身難得如
優曇華出時甚難如是如來應正遍知亦復
如是出世甚難人身難得若無說法則不可

得盡生死苦諸佛正法甚深難知若無佛者
云何聞法若不聞法則不能令眾生苦盡若
我往至如來所已如法難問如法難已畢竟
得發眾生善根畢竟能令菩薩乘人不可思
議佛法滿足此處娑婆世界眾生極重貪欲
極重瞋恚極重愚癡遠離善法習近惡法愚
癡暗鈍無殷重心若其無佛無法無僧云何
而得令彼眾生聞慧根淨爾時文殊師利童
子如是思惟我召十方無量百千諸菩薩眾
令集此處聞如來法以身證知甚深法忍爾

第七

三

時文殊師利童子念已即入普光離垢莊嚴
三昧入三昧已放大光明遍照十方不可計
數阿僧祇耶不可思議無量無邊恒河沙等
諸佛世界即時十方不可計數阿僧祇耶不
可思議無量無邊恒河沙等諸佛世界大光
明現其光明淨十方世界坑澗堆阜樹林諸
山斫迦婆羅目真隣陁雪山彌樓摩訶彌樓
一切所有幽暗之處悉皆大明不相障礙爾
時十方不可計數阿僧祇耶不可思議無量
無邊恒河沙等諸佛世界諸佛世尊皆悉現

在現命現住彼佛侍者既觀光明各問其佛
白言世尊何因何緣於此世界大光明現昔
未見聞如是光明甚可愛樂世尊如是光明
我等遇之心得清淨身力增益貪欲恚癡不
染衆生是誰威力何人寶藏如是淨光是誰
所放如是問已彼佛世尊默然不答如是十
方諸佛世界天聲龍聲夜叉聲阿脩羅聲迦
樓羅聲乾闥婆聲人聲非人聲畜生聲如是
衆聲一切止息風聲水聲大海潮聲歌詠等
聲如是諸聲以佛力故一切止息皆悉寂然

一切寂靜第一寂靜彼佛侍者各各如是第二第三請其佛言如是世尊何因何緣有此光明惟願說之惟願說之如來若說則能利益一切衆生饒益安樂一切衆生令多衆生一切皆得義相應樂利安人天是誰威力放

案七

四

此光明遍照一切諸佛世界爾時十方不可計數阿僧祇耶不可思議無量無邊恒河沙等諸佛世界諸佛世尊一切同聲皆共一音一切諸佛同一口業皆同一法爲侍者說彼佛侍者一一皆知如來所說彼佛世尊所出

音聲遍滿一切諸佛世界彼諸天人一時俱作百千伎樂彼樂音中說言無常苦無我等如是如是和合出聲所謂空聲無相聲無願聲無染聲解脫聲法性聲真如聲實際聲布施聲持戒聲忍辱聲精進聲禪定聲般若聲柔和聲利益聲慈聲悲聲喜聲捨聲出如是等百千法聲此聲出已有不可數億那由他百千衆生必定不退阿耨多羅三藐三菩提不墮聲聞緣覺之地不墮帝釋大梵天王轉輪王地爾時十方不可計數阿僧祇耶不可

思議無量無邊恒河沙等諸佛世界諸佛世尊告侍者言止善男子汝不須問非汝境界非諸聲聞緣覺境界聲聞緣覺若聞我說心意迷亂我若說者一切天人皆悉迷沒善男子以要言之彼法光明所有功德能令衆生乃至無量不可思議善根成就五能令一切菩薩乘人乃至無量不可思議布施助道戒忍精進禪慧助道皆悉滿足善男子汝今當知若以一劫若餘殘劫說此光明所有功德不可窮盡諸佛菩薩於諸衆生起慈悲心放此

光明令諸衆生渴仰欲聞汝今諦聽善思念之我爲汝說彼侍者言如是世尊願樂欲聞彼佛世尊各告侍者作如是言善男子有佛世界名曰娑婆彼中有佛號釋迦牟尼如來應正遍知於今現在現命現住明行足善逝世間解無上士調御丈夫天人師佛世尊出五濁世彼處衆生貪欲瞋恚愚癡所縛無恭敬心諸根暗鈍無慙無愧爲彼衆生於彼世界如法苦行獲得阿耨多羅三藐三菩提覺已而爲說法善男子彼娑婆世界釋迦牟尼

如來佛土有童子菩薩摩訶薩名文殊師利
有大勢力大智慧力大精進力能與一切菩
薩歡喜菩薩化主菩薩導首安慰衆生菩薩
之父菩薩之母解了一切諸法句義點慧明
了得無障礙慧波羅蜜得無障礙願力自在
得陀羅尼不可思議功德具足於彼釋迦牟
尼如來所說法中善能問難能令衆生善根
成就令一切菩薩乘人不可思議佛法滿
足善男子彼文殊師利童子菩薩爲集十方
不可計數諸菩薩故放此光明隨何等入聞

法因緣放此光明彼佛侍者各問其佛白言
世尊彼文殊師利童子菩薩住何三昧而能
如是放斯光明彼佛答言善男子有三昧門
名曰普光離垢莊嚴文殊師利童子菩薩住
是三昧而能放此如是光明彼侍者言不爾
世尊如是光明豈非彼佛世尊所放能如是
清能如是淨能作如是身心喜樂佛言不爾
善男子菩薩常法共說菩薩教誡法門爾時
十方不可計數阿僧祇耶不可思議無量無
邊恒河沙等諸佛世界彼不可數阿僧祇耶

卷七

六

不可思議無量無邊恒河沙等諸佛世界一
一世界諸菩薩等既觀光明各到佛所頭面
禮足白言世尊如是無量功德光明從何處
來誰之所放彼佛告言善男子有佛世界名
曰娑婆彼中有佛號釋迦牟尼如來應正遍
知於今現在現命現住為諸菩薩說清淨法
彼有童子菩薩摩訶薩名文殊師利放此光
明為集十方諸菩薩故如是說已彼諸菩薩
摩訶薩等各請其佛白言世尊我今欲詣娑
婆世界奉見世尊釋迦牟尼如來應正遍知

供養彼佛禮拜親近諮請問答并見童子文
殊師利及餘菩薩摩訶薩等佛言便往今正
是時時彼十方不可計數阿僧祇耶不可思
議無量無邊億那由他有頻婆羅百千菩薩
摩訶薩等各禮佛足於其國土忽然不現譬
如壯士屈伸臂頃一刹那頃一羅婆頃摩侯
多頃各各到此娑婆世界既到此已皆至世
尊釋迦牟尼如來住處有雨細末鬘利香者
雨塗香者有雨華者雨天優鉢羅華鉢頭摩
華拘物頭華分陀利華阿提目多伽華雨瞻

箇華波吒羅華檀尼師迦梨迦華須摩那華
婆利師華曼陀羅華波流沙華摩訶波流沙
華梅陀羅華摩訶梅陀羅華雨如是等無量
妙華雨如是等無量妙香雨華香已往至世
尊釋迦牟尼如來佛所或有菩薩同聲讚歎
如來功德讚歎之聲聞於三千大千世界如
是讚歎至如來所如是種種各各異法而來
集會皆到世尊釋迦牟尼如來佛所到佛所
已彼諸菩薩摩訶薩等威德力故令此世界
若干地獄若干畜生若干餓鬼所受苦惱皆

得休息無一衆生貪欲所惱亦復不爲恚癡
所惱無有嫉妬無幻僞者無諂曲者無憍慢
者亦不自是亦不忿恚亦不熱惱一切衆生
慈心相向甚有愛念皆悉和順時彼菩薩億
那由他百千之衆皆到世尊釋迦牟尼如來
佛所頭面禮足右繞如來有一帀者有二帀
者有三帀者有多帀者繞如來已上虛空中
去地不遠一多羅樹忽然不現一切皆入隱
一切身菩薩三昧入三昧已隨心所樂出生
蓮華有種種色華有無量百千衆葉於華莖

上結跏趺坐身不動搖爾時長老摩訶迦葉
 見此希有未曾有法神通之事復見雨華復
 見雨香復聞樂聲百千種音見大光明復見
 雨華遍四天下滿此世界積過於膝見佛大
 會天龍夜叉乾闥婆阿脩羅迦樓羅緊那羅
 摩睺羅伽人與非人比丘比丘尼優婆塞優
 婆夷等身皆金色爾時長老摩訶迦葉從座
 而起整服左肩右膝著地攝身圓坐向佛合
 掌偈讚請曰
 歡喜常快樂 善淨口業說 具十力雄猛

功德有百種	人處天處行	悉無與等者
巨思無稱量	惡意未已盡	百那由他劫
久修施戒等	尊戒絕譬類	無教誡善逝
力忍力善力	復有十力力	無心作功德
願斷我疑網	見苦惱衆生	百劫修苦行
而心不疲倦	已令得歡喜	捨國城妻子
頭目等種種	一切心喜與	願斷我疑網
世尊久已捨	象馬及輦舉	頭衣等種種
捨百那由他	飲食舍等物	捨與牟尼那
施時常歡喜	是故成善逝	割截身體時

忍受無瞋恨	隨問皆能答	巧說忍善力
修行於空法	善思量淨施	功德畢竟持
故我問清淨	貪瞋癡磨滅	見衆生苦惱
貪瞋癡所覆	我想而自纏	悲心愍此故
百劫行到道	示導諸有者	是故我歸依
以智慧增長	<small>七</small> 彼得行善行	<small>九</small> 常爲諸衆生
說空法令樂	無屈行善因	成善逝世尊
世尊禪清淨	願斷我疑網	修行施戒忍
精進悉已備	禪慧皆具足	常樂修慈心
無等等功德	如海不思議	如海水之深

是故我歸依	世尊於往昔	一鳥來歸依
自割盡身肉	變變秤稱之	舉身上稱槃
乃與鳥平等	世尊大慈光	願斷我疑網
大山可動轉	虛空可令有	諸天功德舍
亦可墮此地	海水可枯竭	脩羅宮可墮
日月可墜落	世尊語叵異	
爾時長老摩訶迦葉	以偈讚歎請如來已白	
言世尊以何因緣	有大光明遍照世界如是	
妙色昔所未有	今見此瑞佛告尊者大迦葉	
言止止迦葉汝今云何	作如是說莫如是問	

如此之事非是一切聲聞緣覺所能測量一切天人所迷沒處惟是諸佛如來所知尊者大迦葉白佛言世尊如來若說多所利益多人安樂爾時世尊即告尊者大迦葉言汝今諦聽善思念之我爲汝說大迦葉言善哉世尊願樂欲聞佛言迦葉文殊師利童子今入普光離垢莊嚴三昧以三昧力放此光明遍照十方不可計數阿僧祇耶不可思議無量無邊恒河沙等諸佛世界普召十方不可計數阿僧祇耶不可思議無量無邊億那由他

有頻婆羅百千菩薩皆悉集此娑婆世界彼諸菩薩今者皆悉頂禮我足右繞三匝上虛空中去地不遠一多羅樹坐蓮華座爾時尊者摩訶迦葉白佛言世尊彼諸菩薩威神之力乃能如是雨華雨香雨末香等百千音樂皆出妙聲佛言如是如是迦葉此諸菩薩威力如是雨華雨香雨末香等百千音樂皆出妙音大迦葉言不爾世尊何處有此菩薩可見佛言迦葉彼乃非是聲聞緣覺之所能見何以故迦葉何處大悲菩薩境界何處大慈

案七

十

何處利益何處修行布施持戒忍辱精進禪定智慧菩薩境界非彼聲聞緣覺信行迦葉當知此諸菩薩一切皆入隱一切身菩薩三昧聲聞緣覺所不能見惟如來見如是迦葉已住此地菩薩能見住地菩薩尚不能見此善男子惟依信行何況聲聞緣覺能見若能見者無有是處爾時長老摩訶迦葉白佛言世尊菩薩修行成就幾法行何善根成何功德而能得入隱一切身菩薩三昧佛言迦葉諸菩薩摩訶薩畢竟成就十種法故則能得

入隱一切身菩薩三昧何等為十一者信行堅固二者為滿大悲心常不捨一切眾生三者捨一切物四者受持佛法而不取著五者不受聲聞緣覺智慧六者一切所有皆悉能捨乃至身命何況餘物七者行不可數有為諸行而心不取彼有為行八者不可數量施戒忍進禪慧滿足波羅蜜行而不分別九者起如是心一切眾生我悉安置於佛法中令趣菩提十者不取眾生不取菩提迦葉當知諸菩薩摩訶薩畢竟成就如是十法則便得

入隱一切身菩薩三昧爾時長老摩訶迦葉
白佛言世尊快說此語世尊乃能作如是說
世尊聲聞緣覺不曾一心發如是意一切衆
生我皆令其得阿羅漢尚不起心置諸衆生
羅漢法中何況佛法佛言如是如是迦葉聲
聞緣覺皆不能入隱一切身菩薩三昧此三
昧名尚不能知何況能得云何能入若能入
者無有是處爾時長老摩訶迦葉白佛言世
尊我今欲見彼諸菩薩何以故如法正士難
可見故佛言迦葉汝覓文殊師利童子則便

得見彼諸菩薩起彼三昧汝乃見之復次迦
葉汝已獲得一切三昧攝入三昧覓彼菩薩
摩訶薩等為在何法專心修行爾時長老摩
訶迦葉世尊既聽以佛神力自神力故即入
二萬諸三昧門入已復起欲望得見彼諸菩
薩在於何法專心修行而不能知非彼菩薩
若來若去是故不知或非住處或在住處或
何所作或何所說一切不見一切不知爾時
長老摩訶迦葉白佛言世尊希有世尊甚奇
善逝世尊我入二萬諸三昧門欲望得見彼

諸菩薩在於何法專心修行而不能見菩薩如是尚不可見何況如來菩薩未得一切智處已得如是三昧法門菩薩摩訶薩未得一切智猶尚如是何況已得世尊其誰智慧若善男子若善女人若聞若見如此之事而不發於阿耨多羅三藐三菩提心者何人聞見而不發心如是世尊隱一切身菩薩三昧威神之力尚不可測何況復有其餘三昧佛言如是如是迦葉一切聲聞緣覺之人尚非境界況餘衆生爾時長老舍利弗作如是念佛

卷七

十二

說我於聲聞弟子智慧人中最為第一若我覓彼菩薩摩訶薩在於何法專心修行應能見知爾時長老舍利弗作是念已以佛神力自神力故即入三萬諸三昧門入已復起欲望得見彼諸菩薩在於何法專心修行而不能見彼諸菩薩乃至少相爾時長老須菩提作如是念我應能見彼諸菩薩在於何法專心修行爾時長老須菩提作是念已以佛神力自神力故即入四萬諸三昧門入已復起欲望得見彼諸菩薩在於何法專心修行而

不能見非彼菩薩若來若去是故不知或非
住處或在住處或經行處非是卧處非是坐
處一切不見一切不知爾時長老須菩提禮
二足尊而作是言世尊如來說我阿蘭若行
最為第一如是寂靜三昧法門我已得之如

第七

十三

是世尊此四天下四洲世界我見明了如一
鼓頭第二世界我見明了如二鼓頭世尊譬
如有人生便捉杖如須彌山我入三昧彼執
杖人即住我前一劫打鼓不曾暫住更不異
作隨彼打鼓如是我得爾許三昧惟我究竟

阿蘭若行若經一劫彼鼓音聲不著耳識何
況能起如是三昧若彼鼓聲能起三昧無有
是處世尊彼如是法具足寂靜我如是法智
慧具足四萬三昧入已復起欲望得見彼諸
菩薩乃至一人而不能見亦復不能知其住
處如是世尊菩薩摩訶薩知如是法寧為一
一衆生利益恒河沙劫生大地獄住地獄中
如是世尊彼諸菩薩而不捨離彼如是法不
可思議甚深智慧如是世尊若我漏心未解
脫者於未來際常在生死更不捨離如是大

乘爾時世尊讚歎尊者須菩提言善哉善哉
汝須菩提以心信故作如是說汝此受陰若
不涅槃必得授記汝之善根作恒河沙轉輪
王已然後必得阿耨多羅三藐三菩提覺又
須菩提三千大千世界衆生寧爲多不須菩
提言甚多世尊甚多善逝佛言如是須菩提
彼諸衆生皆得智慧如須菩提如舍利弗諸
大聲聞之所知見皆共和合乃至一劫若百
千劫覓彼菩薩望得見者無力能見何以故
非須菩提聲聞緣覺所知境界彼諸菩薩摩

訶薩行一切聲聞緣覺不行說此法時會中
八萬四千天人一切皆發阿耨多羅三藐三
菩提心爾時文殊師利童子作是思惟在他
處住無量菩薩億那由他百千之衆我今普
召令集此處爾時文殊師利童子既思惟已
即時如法現神通行現神通已十四化作八萬四
千蓮華億那由他百千眷屬大如車輪金葉
銀莖勝藏羅網毗瑠璃鬚彼蓮華中有化菩
薩於華臺上結跏趺坐金色之身具三十二
大人之相具足功德具足妙色具足衆好具

足光明時彼蓮華至四天王三十三天夜摩
兜率如是化樂他化自在此化蓮華如是遍
到一切處去若干處處召此三千大千世界
百億須彌四天王天乃至遍召色界天彼
化蓮華遍至一切欲界天子色界天子若干
宮殿出聲普召一切皆聞彼菩薩身遍至三
千大千世界說偈召曰
慧日大世尊 時乃出世間 佛如優曇華
如是甚難值 雄猛釋師子 出現此世間
依正法正說 盡一切苦惱 雖久食天味

恣心五欲樂 復隨惡行去 而於何處受
若干欲愛食 而復更增長 有為行衆生
三界悉無樂 已得第一難 所謂佛出難
愚癡著我慢 不知非盡苦 汝等宜速去
見佛聞勝法 莫於佛滅後 心悔何所及
錯入魔王羅第七 大怖畏之處 長夜癡著樂
何時得解脫 惟有聞正法 能生衆生福
速到三十二 大人相佛所 佛能救衆生
餘不可歸依 佛是世間主 大慈不思議
修行不可數 不可思議劫 集無上智慧

成佛釋師子	開示第一法	深寂難可見
何處無衆生	非命非丈夫	一切時常捨
永斷無有餘	除捨一切相	爲衆生說法
何處開實際	世間無心行	以彼空無相
亦無願不作	無染無相貌	不生亦不滅
不來亦不去	演說法明了	不生亦不盡
無少物可憶	無相貌可見	無思憶念說
無少衆生生	無少衆生死	無涅槃衆生
何處衆生出	說法如響聲	無響聲可取
人尊解字相	如是而說法	若何處不遍

不得風水火	地不是分別	智慧眼所說
色受想行識	如是等皆空	雖說五陰法
無物可積聚	眼耳鼻舌身	如意自相空
雖復說彼空	而空不可得	色聲香味觸
皆是意所樂	虛妄起此法	無自根本空
如是諸衆生	解佛所說法	欲得脫苦處
應到醫師所		
彼化菩薩周遍三千大千世界說此偈時九		
十六億欲界諸天色界天子遠塵離垢得法		
眼淨十千天子是菩薩乘修行之人一切皆		

得無生法忍時彼菩薩所召天子不可數量
阿僧祇耶百千之衆一刹那頃一羅婆頃摩
侯多頃可往世尊釋迦牟尼如來應正遍知
往到佛所頭面禮足右繞三匝住在一面以
天華香優鉢羅華鉢頭摩華拘物頭華分陀
利華曼陀羅華摩訶曼陀羅華末香塗香周
散如來大身諸天上虛空中歌詠讚歎彼時
多有若干天人皆悉來至此四天下遍滿世
界無有空地如擲杖處所有地處皆悉遍滿
爾時大身勝妙天子此四天下世界之中兩

華遍滿積過於膝爾時善住意天子善寂天
子慙愧持天子九十六億諸天子俱樂行一
切菩薩之道皆共往詣文殊師利童子住處
既往到已在於文殊師利童子住處寺外右
繞七匝雨天曼陀羅華如雨而下所雨之華
遍覆虛空高十由旬成大華網臺形如浮圖
有大光明遍照三千大千世界皆悉大明雨
天曼陀羅華於文殊師利童子寺所爾時文
殊師利童子如法思惟於此三千大千世界
上虛空中華網遍覆華網光明遍照三千大

千世界皆悉大明爾時文殊師利童子從自
寺出隨心所樂有妙寶座即坐其上爾時善
住意天子頭面敬禮文殊師利童子足下餘
諸天子一切悉禮文殊師利童子足已爾時
文殊師利童子如是思惟何等^{十七}人能與我相
隨於世尊前問答論義或說何等不思議句
難解句無處所句不戲論句無戲論句不可
說句甚深句實句無障礙句不破壞句空句
無相句無願句真如說句實際句法界句無
相似句不取句不捨句佛句法句僧句得智

慧滿足句三界平等句一切法無所得句一
切法不生說句師子句健句無句如是說
已當有何等堪受法器能聽受者爾時文殊
師利童子如是思惟善住意天子已曾供養
過去諸佛辯才無礙彼則堪能與我相隨於
世尊前問答論義爾時文殊師利童子如是
念已語善住意天子言善住意天子汝得深
忍無礙辯才於世尊前與我相隨問答論義
於是善住意天子語文殊師利童子言文殊
師利如是我說若彼於我不聽不讀不受不

持不思不念不取不捨不覺不知不聞我說
不爲他說何以故佛道無字無心覺悟惟說
名耳如此名者不可修行文殊師利今此地
處所說法語此諸天子於仁者邊作意欲聽
仁爲說不文殊師利答言天子若有念言我

聽法者我不爲說欲得不取我不爲說何以
故有我可取可得言聽如是取衆生取命取
丈夫如是取者可得言聽若使天子有我慢
心取我我所若如是者彼說我聽如是取著
而說法者有三障礙何者爲三一者得我二

者得衆生三者得法天子當知若非我慢非
我我所如是聽法有三圓淨心不分別無所
希望無所憶念彼何者法是三圓淨謂不得
我心不分別無所希望無所憶念不得法器
心不分別無所希望無所憶念無所得法心
不分別無所希望無所憶念天子當知若如
是聽彼平等聽非不平等時善住意天子讚
言善哉善哉文殊師利云何名爲不退轉耶
惟願說之文殊師利言止止天子汝莫分別
若使菩薩有退轉者菩提正覺非得菩提天

卷七

十八

子問言文殊師利何處退轉文殊師利答言
天子貪欲退轉瞋恚退轉愚癡退轉有愛退
轉無明退轉乃至十二有支退轉因退轉見
道退轉名退轉色退轉欲界退轉色界退轉
無色界退轉聲聞行退轉緣覺行退轉分別
退轉取著退轉體退轉取體退轉斷退轉常
退轉取退轉捨退轉我想退轉衆生想退轉
命想退轉丈夫想退轉意思退轉障礙退轉
顛倒退轉自身退轉自身見退轉自身根本
六十二見退轉五蓋退轉五取陰退轉一切

內外入退轉界退轉佛想退轉法想退轉僧
想退轉我成佛我說法我度衆生我破魔王
我得智慧有彼想退轉不分別十力不分別
十八不共佛法不分別根無畏不分別相不
分別佛世界莊嚴不分別聲聞功德一切分
別退轉如是天子若菩薩此處退轉彼不退
轉時善住意天子問言何處不退轉文殊師
利答言天子佛智慧不退轉空不退轉無相
不退轉無願不退轉真如不退轉法界不退
轉實際不退轉平等不退轉天子言若文殊

師利作如是說若菩薩此法分別不分別無分別不分別退轉以是義故得言退轉曰彼有何法而言退轉曰有無非有非無何法退轉何處退轉文殊師利言若不實取若不正取若不如取彼則不取不捨無相可作以是義故得言退轉彼法退轉不可說有不可說無何以故若有若無而退轉者彼則有過何以故若有法退轉則墮常邊若無法退轉則墮斷邊如來說法非斷非常不斷不常是佛所說天子若彼真如前不實想不如實知則

不斷不常如是天子菩薩退轉說此法時十千天子一切皆得無生法忍爾時善住意天子語文殊師利童子言文殊師利今共仁者到如來所見於如來見如來已禮拜讚歎供養恭敬如法問難文殊師利答言天子汝莫分別取如來行天子問言文殊師利如來何處文殊師利答言天子即此前頭有如來住天子問言若有如來我何不見文殊師利答言天子若汝一切見則見彼如來天子問言文殊師利仁者云何作如是說即此前頭有

如來住文殊師利問言天子於意云何今於
 汝前有何物耶天子答言有虛空界文殊師
 利言如是如來者即是虛空界何以故以虛
 空界於一切法悉平等故如是虛空即是如
 來如是如來即是虛空虛空如來不二不異
 如是天子欲見如來當如是觀如實際知非
 有少物可分別取

善住意天子所問經卷上

音釋

叵善火切不可也嚮力切塊充切繒古法切

永樂北藏

善住意天子所問經

第二二册

善住意天子所問經卷中

裳八

元魏三藏毗目智仙共流支等譯

爾時文殊師利童子隨心化作三十二殿四角四柱縱廣正等種種嚴飾甚可愛樂於彼殿中有化牀座以天寶物而覆其上一一牀座有化菩薩具三十二大人之相爾時文殊師利童子以威神力令此蓮華遍行三千大千世界往如來所圍繞世尊及比丘僧滿三帀已住虛空中光明遍滿世尊衆會四方圍繞爾時蓮華臺中菩薩并化殿上諸化菩薩

彼諸菩薩同聲以偈讚如來曰

於恒河沙等	不思議佛所	供養多億佛
熾然勤精進	如是久修行	第一菩提行
彼甚可喜慶	一切人之上	光明色勝妙
三界最第一	離相牟尼尊	說法令人聽
何處無有人	無命無丈夫	世尊如是知
一切人之主	行布施持戒	是第一律師
忍辱勤精進	如禪定思量	具足深般若
三界不著尊	善知彼岸道	是故我歸依
若憶念知有	世間人之主	法主之世尊

天人來供養	於甚深空法	究竟無有餘
當知如是人	世界之尊主	過去諸如來
有方處人主	常說彼空法	無物本無相
此處無衆生	若生若死滅	不來亦不去
一切法相空	化人空中眠	非是真實見
是法善遊說	如化亦如夢	恒沙世界寶
布施與何人	此福感有爲	空忍勝於是
劫際如恒沙	供養人中尊	奉香華飲食
爲得佛菩提	若聞如是法	無人命丈夫
得彼忍光明	供養如來上	多劫行布施

飲食象馬等	彼非解脫因	以有人相故
彼寂靜人上	令多衆解脫	空性本光明
知解脫莊嚴	佛出世難值	聞法生信難
生世爲人難	善哉入佛法	已離於八難
復得於難得	得信善逝法	善思惟得見
常專心聽法	莫如聲取義	恒宿阿蘭若
必得人中雄	近善友法器	遠離惡知識
等心於衆生	莫欺於菩薩	持戒樂多聞
糞掃衣乞食	近樹下精進	隨得食而食
有爲皆無常	一相如陽焰	一際如真諦

速得菩提覺 五陰如幻化 內外入空聚
常說如是法 彼處無造作 貪瞋本空無
癡慢分別起 非已今當有 如是知得佛
說此偈時於衆會中二萬二千人皆發阿耨
多羅三藐三菩提心五百比丘不受諸法漏
盡心得解脫三百比丘尼遠塵離垢得法眼
淨七千優婆塞優婆夷二萬七千天子得離
垢法眼三百菩薩得無生法忍於此三千大
千世界六種震動遍動等遍動震遍震等
遍震爾時長老舍利弗白佛言世尊是誰威

力令此三千大千世界六種震動此蓮華中
殿中菩薩善說如是甚深之法放大光明遍
照此會如是無量多億天子皆悉來集如是
無量多億菩薩皆悉來集佛告舍利弗此是
文殊師利童子威神力故得見如是妙色莊
嚴何以故舍利弗文殊師利童子與善住意
天子今日相隨請問如來破壞魔軍三昧法
門如法問難不可思議甚深佛法尊者舍利
弗言不爾世尊文殊師利童子未來此會我
不曾見佛言舍利弗汝善諦觀如是文殊師

利童子今在此處與一切魔一切魔衆一切
魔宮作大衰變極大莊嚴來至我所爾時文
殊師利童子入壞魔軍三昧法門文殊師利
入壞魔軍三昧門時若干三千大千世界百
億魔宮毀變欲壞陳朽暗冥無有威光一切
魔身皆悉衰變極成老弊各自知見拄杖而
去魔之眷屬亦復如是見已宮殿毀變欲壞
陳朽暗冥無有威光爾時衆魔皆生怖畏驚
恐毛豎心生疑慮作如是念以何因緣我此
宮殿毀變欲壞如是陳朽如是暗冥無有威

光莫令我身退失此處時彼衆魔生如是心
未久之間爾時文殊師利童子即復化作百
億天子在於魔前彼化天子語魔波旬作如
是言汝莫怖畏非汝有惡非汝有衰非汝欲
退今有童子菩薩摩訶薩名文殊師利得不
退轉彼今住在破壞魔軍三昧法門是彼善
薩威力所作彼化天子說如是語時魔旣聞
文殊師利童子名已轉更恐怖一切魔宮皆
悉戰動時魔波旬語化天子作如是言願君
救我願君救我時化天子語魔波旬作如是

言勿怖勿怖汝今往詣釋迦牟尼如來佛所
如來大悲於怖畏者能施無畏彼化天子如
是說已即於其處忽然不現時魔波旬一切
眷屬於一念頃一羅婆頃摩侯多頃百億波
旬無量眷屬如老極老拄杖而去何處如來
應正遍知往到佛所一切同聲而白佛言救
我世尊救我世尊救我善逝救我善逝惟願
世尊救我救我惟願善逝救我救我我本妙
色今者如是衰變不好世尊我寧聞說億百
千佛如來名號而不用聞文殊師利童子一

名何以故以我聞此文殊師利童子名字生
大怖畏驚恐危故畏退失故我今如是恐畏
退失爾時世尊語魔波旬作如是言汝今云
何如是說耶億百千佛如來名號不作一切
衆生利益不曾已作今亦不作當亦不作如
是文殊師利童子常作一切衆生利益已作
今作當作利益衆生熟已令得解脫汝今雖
聞億百千佛如來名號不生苦惱不生怖畏
云何而言文殊師利一童子名我不用聞爾
時魔波旬白佛言世尊我甚慙愧如是身老

我甚怖畏世尊我憶本身我憶本色願還如
本少身少色佛言波旬且住且住且待須臾
文殊師利童子菩薩當來至此汝此色者非
是真色宜可除捨爾時文殊師利童子起彼
三昧無量百千諸天尊從無量百千諸大菩
薩諸龍夜叉乾闥婆阿脩羅迦樓羅緊那羅
摩睺羅伽百千音樂皆出妙聲優鉢羅華鉢
頭摩華拘物頭華分陀利華如雨而下極大
莊嚴娛樂戲樂來至佛所頭面禮足右繞三
匝却住一面爾時世尊告彼童子文殊師利

作如是言文殊師利汝入破壞一切魔軍三
昧門耶文殊師利答如來言入已世尊爾時
世尊問童子言文殊師利於何佛所得是三
昧聞此三昧其已久如文殊師利童子答言
世尊未發菩提心時我從彼佛得聞如是三
昧法門我此三昧如是成已世尊問言文殊
師利彼佛如來名字何等說是三昧汝從彼
佛得聞如是三昧法門文殊師利答言世尊
乃往過去無量無邊不可思議阿僧祇耶阿
僧祇劫有佛出世號曼陀羅婆華香如來應

正遍知行足善逝世間解無上士調御丈
夫天人師佛世尊彼說如是三昧法門我從
彼佛得聞如是破壞魔軍三昧法門世尊問
言文殊師利此三昧門云何而得文殊竟成
答言世尊有二十法若菩薩摩訶薩畢自利

就彼二十法得此三昧能壞魔軍何等二十
世尊所謂菩薩破壞貪欲破壞貪心破壞瞋
恚破壞瞋心破壞愚癡破壞癡心破壞嫉妬
破壞嫉心破壞憍慢破壞慢心破壞妬嫉破
壞妬心破壞垢惡破壞垢心破壞熱惱破壞

熱心破壞想念破壞想心破壞見著破壞見
心破壞分別破壞分別心破壞取著破壞取
心破壞執著破壞執心破壞取相破壞相心
破壞有法破壞有心破壞常法破壞當心破
壞斷法破壞斷心破壞陰法破壞陰心破壞
界法破壞界心破壞入法破壞入心破壞三
界破壞三界心如是二十菩薩若能畢竟成
就此二十法得此三昧復次世尊有四種法
若菩薩摩訶薩畢竟成就彼四種法得此三
昧何等為四一者清淨心二者不諂曲心三

者深心四者一切施與如是四法菩薩若能畢竟成就此四種法得此三昧復有四法若菩薩摩訶薩畢竟成就彼四種法得此三昧何等爲四一者不違於信二者畢竟實語三者隨順想行四者不取一切法是爲四法復有四法若菩薩摩訶薩畢竟成就彼四種法得此三昧何等爲四一者親近善知識二者正念思惟三者如法修行四者不與惡人相隨是爲四法復有四法若菩薩摩訶薩畢竟成就彼四種法得此三昧何等爲四謂不缺

戒不穿漏戒不所止戒不濁戒等是爲四法復有四法若菩薩摩訶薩畢竟成就彼四種法得此三昧何等爲四一者捨聲聞心二者不受辟支佛心三者堪忍住持四者不捨衆生是爲四法復有四法若菩薩摩訶薩畢竟成就彼四種法得此三昧何等爲四一者修習空法不取丈夫二者修習無相不取於相三者修習無願不取願心四者心不貪著一切能捨是爲四法世尊菩薩摩訶薩畢竟成就如是法門是故得此破壞魔軍三昧法門

卷八

七

如是世尊彼曼陀羅婆華香如來說此三昧
門我從彼佛得聞如是三昧門已復有如來
號一切珠寶電蔽日月光如來應正遍知我
於彼佛聞此三昧具足成就彼佛說此三昧
門時彼衆會中十千菩薩皆得成就此三昧
門爾時長老舍利弗白佛言世尊希有世尊
今此童子文殊師利乃能善得此三昧門既
成就此三昧門已令魔波旬得此衰變爾時
世尊即告尊者舍利弗言於意云何汝舍利
弗見此三千大千世界魔波旬輩如是變者

勿作是見何以故舍利弗如是十方恒河沙
等諸佛世界彼魔波旬一切皆悉如是衰變
悉是文殊師利童子威力所作爾時世尊如
是說已復告文殊師利童子作如是言文殊
師利止汝神力所入三昧令魔波旬還復前
色如本具足爾時文殊師利童子即止神力
時魔波旬一切前色皆悉還復如本具足爾
時文殊師利童子問魔波旬作如是言魔波
旬輩何處波旬眼何處眼想何處眼著何處
眼相何處眼攀緣何處眼障礙何處眼憶念

何處眼我何處眼依止何處眼喜樂何處眼
 戲論何處眼我所何處眼護何處眼修何處
 眼取何處眼捨何處眼分別何處眼思量何
 處眼決定何處眼滅何處眼生何處眼執何
 處眼來如是等法是汝境界魔業妨礙如是
 至意應如是知色乃至法應如是知何處波
 旬非眼非眼想非眼著非眼相非眼攀緣非
 眼障礙非眼憶念非眼我非眼依止非眼喜
 樂非眼戲論非眼我所非眼護非眼修非眼
 取非眼捨非眼分別非眼思量非眼決定非

眼滅非眼生非眼執非眼來如是等法非汝
 境界汝於其中無主無力無自在非自在取
 如是至意應如是知色乃至法應如是知爾
 時文殊師利童子如如法說彼魔眾中十千
 魔眾發阿耨多羅三藐三菩提心魔之眷屬
 八萬四千遠塵離垢得法眼淨爾時長老摩
 訶迦葉白佛言世尊我欲得見文殊師利童
 子并彼菩薩摩訶薩何以故世尊如是善人
 難可得見爾時世尊語文殊師利童子言文
 殊師利汝現十方諸來菩薩摩訶薩身此會

大衆渴仰欲見爾時文殊師利童子語諸菩薩名法菩薩希有日光菩薩魔伏菩薩妙音菩薩定惡菩薩寂治菩薩勝治菩薩法王吼菩薩語如是等無量菩薩摩訶薩言各各現汝童子本身如汝各各自佛世界諸菩薩身

第八

九

文殊師利如是說已爾時彼彼諸菩薩等起彼三昧起三昧已各示本身一切皆見彼大衆中有菩薩身等須彌山有菩薩身八萬由旬有菩薩身百千由旬有菩薩身九十八十七十六十五十四十三十二十十千由旬復

有菩薩摩訶薩身一千由旬有菩薩身五百由旬有菩薩身一百由旬有菩薩身五十由旬四十由旬三十由旬二十由旬十由旬者有五由旬至一由旬復有菩薩摩訶薩身如此娑婆世界衆生三肘半身自有菩薩示如是身當爾之時此處三千大千世界無有空地如擲杖處一切悉遍勝勝菩薩摩訶薩集彼諸菩薩摩訶薩等放大光明遍照十方億千諸佛如來世界爾時文殊師利童子從座而起整服左肩右膝著地攝身圓坐向佛合

掌白言世尊我聞如來應正遍知一面方處如是世尊我於今者欲少問難願為解說佛言文殊師利如來應正遍知恣汝所問文殊師利隨意問難我能解說令汝心喜爾時文殊師利童子一切衆會至心靜聽文殊師利言世尊所言菩薩摩訶薩者爲何謂耶以何義故得言菩薩摩訶薩乎佛告文殊師利童子作如是言文殊師利所言菩薩摩訶薩者一切法覺得言菩薩摩訶薩也文殊師利一切法者言語所說彼菩薩覺文殊師利如此

菩薩眼覺耳覺鼻覺舌覺身覺意覺文殊師利如此菩薩何者眼覺何者耳鼻舌身意覺文殊師利如此菩薩眼本性空覺非有我覺分別耳鼻舌身意等本性空覺非有我覺分別色聲香味觸法本性空覺非有我覺復次第八文殊師利所言菩薩摩訶薩者五取陰覺何等法覺所謂空覺無相覺無願覺無染覺寂靜覺遠離覺無物覺無體覺不動覺不生覺不來覺不去覺無有覺無主覺無記覺無知覺無見覺無人知覺無戲論覺無我覺分別

起覺無分別起覺因緣生覺如幻覺如夢覺
如燄覺如響覺如芭蕉堅覺不久堅覺無物
空覺復次文殊師利所言菩薩摩訶薩者貪
瞋癡覺云何而覺從分別起貪瞋癡覺彼分
別空非有無體非戲論非記覺復次文殊師
利所言菩薩摩訶薩者謂欲界覺色界覺無
色界覺云何而覺無我行名空遠離覺復次
文殊師利所言菩薩摩訶薩者衆生行覺云
何而覺謂此衆生欲行瞋行癡行平等平等
行故善知行覺彼覺覺已如如法說令彼衆

生如如解脫復次文殊師利所言菩薩摩訶
薩者一切衆生覺云何而覺一切衆生惟空
有名不離彼名更有衆生一切衆生即一衆
生彼衆生者非是衆生若如是知不分別者
得言菩薩摩訶薩也菩薩何等一切法覺彼
覺菩提得言菩薩覺眼耳空十一心不分別我如
是覺得言菩薩覺鼻舌空十一心不分別我如是
覺得言菩薩智慧覺身覺意本空覺已而說
得言菩薩覺色聲香味觸法意樂一切皆空
得言菩薩覺色受想行本性空覺識如幻得

言菩薩五陰如夢一相無相不取我覺得言
菩薩內法不生不戲論覺有爲名說彼名無
物覺貪欲恚分別心生彼不分別常空無物
癡分別生分別因生因見而生不得彼見覺
三界空一切無主非少物行得言菩薩未過
欲界分別中起色無色界一切無主少行衆
生點慧皆覺如是欲行瞋行癡行一切衆生
即一衆生彼衆生無覺法無念一切法生顛
倒心覺覺不實相一切智慧於中生善乃無
一聲可憶可樂無障礙相隨行而行菩薩如

是得言菩薩捨自身肉無所依止次第覺知
得言菩薩得彼岸戒無念佛戒若物不生則
不和合普慈衆生衆生不取覺已利益故說
大慈住精進處思有爲行覺世間空是菩提
上禪有依止非點慧禪無處攀緣是點慧禪
修般若刀割煩惱見觀察法性非壞非割爾
時文殊師利童子白佛言世尊菩薩初發菩
提心者云何說言初發心耶以何義故名初
發心佛言文殊師利何等菩薩正觀三界一
切想生如是得言初發心者文殊師利言世

尊如我解佛所說義者貪生瞋生愚癡心生
得言菩薩初發心者善住意天子語文殊師
利童子言文殊師利若使菩薩初發心時有
貪欲恚愚癡生者毛道凡夫皆有初心應名
菩薩何以故以取貪恚愚癡生故文殊師利
言不爾天子毛道卷八凡夫貪欲恚愚癡無力能生
何以故天子諸佛如來緣覺聲聞不退菩薩
貪恚癡生天子問言文殊師利以何意故如
是說耶如是衆會不解仁者如是言語皆生
疑心云何云何文殊師利問言天子於意云

何於虛空中鳥行動去彼鳥跡相得言有行
得言不行天子言行文殊師利言如是天子
如說彼相如是言語我如是說諸佛如來緣
覺聲聞不退菩薩貪恚癡生天子當知隨於
何處無依止生無處可取彼如是生於何處
所無差別生天子於何處所無所依止無處
可取無差別生不平等生無跡無句不得言
跡不得言句如是言生不分別句如是言生
不他生句如是言生無物體句如是言生無
物說句如是言生以不來句如是言生以不

去句如是言生以不生句如是言生無受持
句如是言生以無記句如是言生以微塵句
如是言生無憶念句如是言生無物行句如
是言生不可說句如是言生不破壞句如是
言生以無字句如是言生以不執句如是言
生無阿梨耶句如是言生以不取句如是言
生以不上句如是言生天子當知初心菩薩
發菩提心於如是法不憶念不觀察不思量
不起不見不聞不知不取不捨不生不滅如
是天子菩薩摩訶薩依止何等此法界此平

等此實際此方便貪生瞋生愚癡心生眼依
止生如是乃至意依止生色無處取生如是
至識無處取生名生色生因生一切見行生
無明生有愛生乃至十二分因緣流轉生五
欲功德生三界處生我我所生自身生自身
見生自身根本六十二見生佛想法想僧想
生我想他我想生地想生水想生火想風想空
想識想生四顛倒生五蓋生四識住八邪九
惱十不善業道生天子當知如是乃至一切
分別一切不分別一切分別不分別一切相

一切戲論一切求一切取著一切喜樂一切
想一切憶念一切障礙菩薩皆生天子如是
法門如是應知天子若於此法不取無喜樂
無處取法如是言生爾時世尊讚歎文殊師
利童子作如是言善哉善哉文殊師利如是
菩薩何處初發菩提之心文殊師利汝已供
養恒河沙等諸佛世尊能如是說爾時尊者
舍利弗白佛言世尊如是世尊如此文殊師
利童子已說菩薩初發菩提心與得無生法
忍此二心生平等無異佛言如是舍利弗如

汝所說舍利弗然燈如來授我記言汝於來
世阿僧祇劫當得作佛號釋迦牟尼如來應
正遍知舍利弗我於爾時不捨此心得無生
法忍如是舍利弗此初發心菩薩如文殊師
利童子所說爾時文殊師利童子白佛言世
尊如我解佛所說義者一切菩薩皆初發心
何以故如世尊說一切心生皆是不生若不
生者則彼菩薩初發心生如是言生說此法
時二萬三千菩薩得無生法忍五千比丘不
受諸法漏盡心得解脫六十億天子遠塵離

卷八

十四

垢於諸法中得法眼淨爾時長老摩訶迦葉
 白佛言世尊文殊師利童子能作難作文殊
 師利童子說法如是能作衆生利益文殊師
 利言長老大迦葉此乃非我能作難作一切
 諸法皆悉不作無有已作無有今作無有當
 作長老大迦葉我亦如是非有法作亦非有
 作亦非不作非有衆生非縛非解何以故無
 物可取乃是正法若大迦葉作如是說能作
 難作汝莫說我能作難作非我難作非如來
 作非阿羅漢非辟支佛長老大迦葉正說何

人能作難作毛道凡夫是正說說何以故長
 老大迦葉若一切佛皆不已得今得當得若
 一切聲聞一切緣覺皆不已得今得當得毛
 道凡夫一切皆得大迦葉言文殊師利一切
 諸佛不得何法文殊師利言長老大迦葉一
 切諸佛皆不得我不得衆生不得壽命不得
 丈夫亦不得斷亦不得常亦不得陰亦不得
 界亦不得入亦不得心亦不得色不得欲界
 不得色界不得無色界不得分別不得無分
 別不得因生不得顛倒不得貪瞋癡不得此

世不得彼世亦不得我不得我所乃至不得一切諸法長老迦葉此一切法悉皆不得不失不脫不取不捨不近不遠如是法門摩訶迦葉應如是知若一切佛悉皆不得毛道尼夫一切皆得如是難作若非佛作非聲聞作非緣覺作則是毛道凡夫人作大迦葉言云何作耶文殊師利言斷作常作阿梨耶作憶念欲作不作取捨戲論分別隨順舉下長老迦葉諸佛世尊不作此法皆不已作今作當作彼凡夫作如是難作爾時文殊師利

童子白佛言世尊言無生忍無生忍者云何而說無生忍耶世尊以何義故言無生忍何法中忍得言法忍菩薩何法得無生忍佛言文殊師利實無有人生中法中得無生忍實無得忍言得忍者惟有言語何以故實無所得彼忍法故不得法忍得無所得不得不失如是得言得無生忍文殊師利無生法忍不生一切法忍不來一切法忍不去一切法忍無生一切法忍不取一切法忍不捨一切法忍無物一切法忍無體實一切法忍無等

一切法忍無等等一切法忍無相似一切法
忍塵虛空相似一切法忍不壞一切法忍不
斷一切法忍無煩惱染一切法忍無淨一切
法忍空無相無願一切法忍離貪恚癡一切
法忍真如法界實際安置一切法忍不分別
無分別無憶念無戲論無思量不作無力羸
劣後時無物空迤互無空太虛空如幻如化
如響如影如燄如芭蕉堅如水泡沫一切法
忍此法忍者非法非非法惟有名說如是名
者無處無取本性自離如是言忍心信解入

卷八

十六

不憶不疑不驚不怖不畏身觸正受行而不
得身文殊師利此法如是得言菩薩無生法
忍又亦不行一切法相文殊師利童子言世
尊所言忍者云何言忍若不為彼境界所傷
彼得言忍爾時善住意天子問文殊師利
子言文殊師利傷何等法文殊師利答言天
子所謂傷眼何法傷眼所謂法者愛不愛色
如是耳聲鼻舌香味身觸意法如是天子愛
不愛法傷意亦爾天子若菩薩眼見色不取
相不取好不分別無分別不隨順不分別行

知本性空不念不傷色乃至法應如是知天子若六入不著不傷若不傷不著彼得言忍菩薩如是得無生法忍不分別法若生不生無漏不漏不分別法若好若惡有爲無爲若不分別如是得言無生法忍說此法時六萬二千人發阿耨^舍多羅三藐三菩^十提心萬二千菩薩得無生法忍爾時善住意天子問文殊師利童子言文殊師利地地轉行地地轉行者云何菩薩地地轉行文殊師利問言天子若地地轉行彼何人行天子答言文殊師利

菩薩不見地地轉行乃至不見十地轉行文殊師利言不爾天子佛說諸法皆如幻化汝爲信不天子答言文殊師利我信是說文殊師利問言天子何等幻人地地轉行如是乃至十地轉行天子答言文殊師利化人不有地地轉行乃至不有十地轉行文殊師利言如是天子若幻化人有轉行者彼我轉行何以故如佛所說一切諸法皆如幻故是故天子如是我說地轉行者不轉行說非是轉行何以故以一切法不轉行故非謂法中法法

轉行非色受轉行非受色轉行非想行轉行
非行想轉行非識色轉行非色識轉行如是
乃至一切諸法皆亦如是皆四種說非眼耳
轉行非耳眼轉行非鼻舌轉行非舌鼻轉行
非身意轉行非意身轉行此一切法各各自
行自分境界法鈍無欲心無意行不思不念
乃至無有計校籌量如草如壁如幻無記非
有記作一相無相以是義故彼非轉行非來
非去天子當知若菩薩能如是知如是菩薩
無法轉行非地分別非地轉行見非是地捨

非是退轉菩提轉行非是失滅何以故若人
見有陰界入體非彼轉行非是失滅以一切
法性本淨故復次天子菩薩如是地轉行者
譬如幻師以幻力作十重宮殿彼自作已即
自坐上於意云何如是彼人有坐處不天子
答言無處坐也十八文殊師利言如是天子菩薩
十地見有轉行亦復如是爾時善住意天子
問文殊師利童子言文殊師利若有人來依
投仁者欲求出家而作是言惟願度我令得
出家文殊師利云何為說云何作法度令出

家云何授戒云何戒品云何教誡文殊師利
答言天子若至我所求出家者我爲說言汝
善男子今者實有出家心不汝若實有出家
心者我當依法度汝出家何以故天子若出
家者或著欲界或著色界或著無色界或著
世間五欲功德九處中行此善男子如是取
法何者九處天子若無少處著彼人心無所
得若心無所得彼人不求出家若不求出家
彼人出家心不生若出家心不生彼人得言
不生若不生者彼則苦盡若苦盡者彼畢竟

盡若畢竟盡彼無所盡若無所盡彼則不盡
若不盡者彼則是空天子彼善男子我如是
說復次天子若至我所求出家者我爲說言
善男子汝今莫生出家之心何以故彼心不
可爲他所生勿保此心復次天子若至我所
求出家者我爲說言善男子汝莫除髮是善
出家者如是者得言出家天子問言文殊師
利以何意故如是說耶文殊師利答言天子
如來說法不斷不壞天子問言何法不斷不
壞文殊師利答言天子色不斷不壞受想行

卷八

十九

識不斷不壞天子隨何等人有如是念我除
髮者彼住我慢非我慢行平等見人如是得
我彼則得髮若得髮者則得衆生若得衆生
則得斷想天子若不得我則不得他若不得
他則無我慢若無我慢彼我寂滅若我寂滅
彼無分別若無分別則不發動若不發動則
不戲論若不戲論則不捨若不捨不捨
彼則非作亦非不作非斷非壞非有想著非
不想著不取不捨不減不增不聚不散無心
憶念不說不答彼實安住天子問言文殊師

利所言實者是何言語文殊師利答言天子
實者虛空得言其實非是空盡不盡不長或
有或無是故得言虛空爲實性空是實真如
是實法界是實實際是實若是實者得言不
實何以故非今實有非後時有是故彼實復
次天子若至我所求出家者我爲說言汝善
男子不取袈裟不著袈裟是汝出家若如是
者得言出家天子問言文殊師利以何意故
如是說耶文殊師利答言天子如來說法皆
悉不取天子問言文殊師利不取何法文殊

師利答言天子謂不取色若常無常如是不
取受想行識若常無常亦不取眼若常無常
不取色不取耳不取聲不取鼻不取香不取
舌不取味不取身不取觸不取意不取法不
取貧不取瞋不取癡不取顛倒如是乃至一
切諸法皆悉不取天子一切諸法不取不捨
不離不散天子若取袈裟是愚癡念如是彼
人如是見行天子是故我說非取袈裟是淨
解脫何以故天子袈裟是濁如來世尊菩提
無濁天子問言文殊師利何法是濁文殊師

第八

二十

利答言天子貪欲是濁瞋恚是濁愚癡是濁
因濁見濁名濁色濁想濁取濁相濁戲論濁
天子若正觀察此不善法皆悉無濁若無濁
者乃至無有少物住處若無住處得言空處
無秉作者天子問言文殊師利言無秉作無
秉作者是何言語而得說言無秉作耶文殊
師利答言天子言無秉作無秉作者如此言
語乃至無有少物秉作如是得言無有秉作
天子若有秉作彼如來說無有秉作如是得
言無有秉作天子問言文殊師利未知何法

是秉作耶文殊師利答言天子過於平等過
 平等已若法不得非今時得非後時得非今
 有生非當有生彼法虛妄住秉作所謂我
 者分別秉作衆生者命者丈夫者人者摩那
 婆者斷者常者分別秉作陰界入等分別秉
 作佛法衆僧第八分別秉作此持戒人此破戒人
 分別秉作煩惱染淨獲得果證分別秉作須
 陀洹果斯陀含果阿那含果阿羅漢法辟支
 佛法分別秉作此空無相無願明解脫無欲
 分別秉作天子此如是法分別秉作毛道凡

夫未曾聞如來分別秉作心欲得法妄想計
 著彼癡凡夫分別分別轉彼妄想著欲得除
 滅如來讚說無有秉作爾時善住意天子讚
 文殊師利童子言善哉善哉文殊師利善說
 如是秉作法門爾時如來讚歎文殊師利童
 子作如是言善哉善哉文殊師利快說此法

善住意天子所問經卷中

善住意天子所問經卷下

第六

元魏三藏毗目智仙共法支等譯

爾時文殊師利童子復語善住意天子言天子若至我所求出家者我為說言汝善男子若不受戒是汝出家若如是者得言出家人子問言文殊師利以何意故如是說耶文殊師利答言天子如佛所說二種受戒何者是二謂等受戒不等受戒何者名為不等受戒謂不等隨何者不等隨謂著我墮著眾生墮著壽命墮著丈夫墮著斷常隨著邪見隨著

貪瞋癡隨著欲界墮色無色界憶念取墮如是天子乃至一切不善法墮惡知識墮不知出法取一切法天子當知如是名為不等受戒天子何者名為平等受戒謂平等隨何者平等謂空平等無相平等無願平等天子若如是證三解脫門如實而入則不分別無所分別則不退轉天子如是名為平等受戒復次天子若修貪欲瞋恚愚癡若修自身自身根本六十二見若修顛倒若修三惡身口意行八邪九惱十不善業道如是得言正受戒

也天子譬如一切種子皆依地生藥草樹林
依地生長平等具足得言具足如是天子此
佛法中若正受戒得言受戒天子譬如一切
種子藥草樹林依大地住如是天子正戒具
足何以故以住戒故法和合有如彼種子藥
草樹林具足生長如是得言平等具足天子
戒依信住如是一切菩提分法以依戒故生
長具足天子如是過去未來現在諸佛世尊
一切聲聞以正受戒是故證得三解脫門一
切戲論皆悉斷滅天子當知如是受戒是正

受戒非不平等復次天子我與彼人如是出
家如是受戒汝善男子當如是學莫憶念取
我如是學是汝出家天子問言文殊師利以
何意故如是說耶文殊師利答言天子一切
諸法皆悉不取天子汝若取戒三界亦取天
子於意云何何者彼學天子答言謂波羅提
木又具足文殊師利問言天子云何波羅提
木又具足天子答言具足名得言身具足言
口具足言意具足者如是得言有波羅提木
又具足文殊師利問言天子於意云何何處

身口意業不作不曾已作今作當作有何相
似可說得言若青若黃若白若赤若頗梨色
答言無也文殊師利問言天子云何得說天
子答言非是有爲如是而說若非有爲彼不
能說身口意業文殊師利問言天子於意云
何若非有爲彼可取不天子答言文殊師利
不可取也文殊師利言天子我意在此故如
是說莫憶念取我如是學天子若勝戒學若
勝心學若勝慧學彼學如際如是應知戒無
所得是勝戒學心無所得是勝心學慧無所

得是勝慧學不分別心不憶念心不生勝心
是勝心學戒學慧學應如是知天子若心無
所得則戒不憶念若戒不憶念則三昧無所
得若三昧無所得則慧無所得若慧無所得
則一切疑不有若一切疑不有則學不取若
學不取如是得言彼學憶念若學憶念彼阿
那含若阿那含彼則清淨若清淨者彼不和
合若不和合彼則不漏若不漏者彼則正行
若如是行無色相似若無色相似彼是虛空
何以故以彼虛空無形色故天子若如是學

卷九

三

彼則不學若不學者彼得言學於何處學彼無處學若無處學如是得言正學而住於是文殊師利童子復語善住意天子言天子我爲彼人如出家法如受戒法如是爲說汝善男子一切三千大千世界信心檀越與汝飲食汝心不念不生分別此食難消此食能消若如是者汝是淨戒天子問言文殊師利以何意故如是說耶文殊師利答言天子若取施者受者財物如是分別得言我淨若取若賞若淨若有所得彼人有淨若心憶念彼人

有淨若心分別彼人有淨天子若更不取不賞不淨若無所得若無憶念若不分別彼云何淨何以故畢竟淨故天子若取若賞若有所得憶念分別得淨信食則是凡夫非阿羅漢何以故凡夫取賞心有所得憶念分別取我分別此人與我如是分別彼得言淨云何名淨凡夫人行取三有生彼如是淨天子阿羅漢果更無少物有異身行不取異身更不轉生何處有淨汝取彼施取三圓淨天子當知何者名爲三圓淨耶所謂不得施者受者

及以財物是三圓淨若如是淨彼不復淨天子我意在此故如是說若一切三千大千世界信心檀越施汝飲食不憶念淨彼世界中得言福田彼善出家爾時文殊師利童子復語善住意天子言天子我於彼人如出家法卷九如受戒法如是為說若汝善男子不宿阿蘭若不住聚落不近聚落不遠聚落不住獨處不乞食行不請食食不糞掃衣不長者家取鉢三衣不露地坐不少欲不知足非常知足不遠離行不樹下住不房中宿不殘宿食不

食酥蜜若汝善男子如是一切頭陀功德聚集能行如是等法不憶念行何以故此慢心人如是相行天子若如是念我糞掃衣我乞食行我樹下坐我喜殘食我喜少欲我喜知足我宿阿蘭若我露地坐我能頭陀我為他說天子當知非正行法如是法生何以故如此無分別彼人尚不得我何況頭陀功德而有所得若有所得無有是處如是天子若此頭陀功德和合修行心不憶念心不分別我說彼人能說頭陀何以故天子若比丘抖擻

貪欲抖擻瞋恚抖擻愚癡抖擻三界抖擻內外六入我說彼人能說抖擻如是抖擻若不取不捨不修不著非是不著我說彼人能說頭陀復次天子如是我為彼出家人如是受戒如是說言汝善男子若如是知非知四諦非修四念處非修四正勤非修四如意神足非修五根非修五力非修七覺分非修八聖道分非修三十七菩提分法非證三解脫門何以故天子如是得言知不生相不修不證何以故非是不生能證念處天子云何而言

安九

五

不是憶念不正觀察一切諸法得言念處天子若比丘不住欲界不住色界不住無色界如是比丘得言無住修四念處云何而修如是不修既不自修不令他修若如是修得言修者如是次第乃至三十七菩提分法應如是知天子何等比丘坐禪禪師於一切法悉無所得彼無憶念若不憶念彼則不修若不修者彼則不證天子以何因緣惟有名說謂三十七菩提分法彼名無物意喜因緣而生此名一相無相如是而說或說或不說皆如

是名諸有識知皆無所得此實知見若有識知此三十七菩提分法皆無所得天子問文殊師利言禪師者何等比丘得言禪師文殊師利答言天子此禪師者於一切法一行思量所謂不生若如是知得言禪師乃至無有少法可取得言禪師不取何法所謂不取此世彼世不取三界至一切法悉皆不取謂一切法悉無衆生如是不取得言禪師天子若彼禪師無少法取非取以是義故得言禪師說是法時會中無量百千衆生皆生疑

心云何云何此云何取云何不取如來說言知三解脫門得證涅槃修三十七菩提分法證涅槃者而此文殊師利童子遮菩提分法得證涅槃者此文殊師利童子所說與如來語不相應耶爾時文殊師利童子知彼比丘心生疑已即問長老舍利弗言大德舍利弗汝信如來說汝智慧最第一耶大德舍利弗於何時中無欲法證有何法證大德豈不證四諦耶修三十七菩提分法或證三解脫門長老舍利弗言文殊師利乃至無有少法可

得若修若證若知若得何以故以一切法不
取不生無記空證不空空證說此法時三千
比丘不受諸法漏盡心得解脫爾時善住意
天子讚歎文殊師利童子作如是言善哉善
哉文殊師利利智慧入善說如是甚深空忍
文殊師利言天子我非利智一切毛道凡夫
利智何以故毛道凡夫如利智知何者利智
地獄利智畜生利智餓鬼利智閻魔羅王世
間利智三界利智如是利智得言利智不知
前際諸有爲行天子毛道凡夫貪欲利智瞋

惠利智愚癡利智非是聲聞非是緣覺得忍
菩薩如是天子愚癡利智如是應知天子問
言文殊師利仁戲論不文殊師利答言不也
天子問言學他語耶文殊師利答言不也天
子問言惟言語耶文殊師利答言如是如是
天子我取言語天子問言文殊師利以何意
故如是說耶文殊師利答言天子若菩薩一
字一句不動彼字不動句義次第問道如實
而知不知空不知離知無體知不生如是知
若不知非知非解非受非作是故得言惟言

語句爾時世尊讚歎文殊師利童子作如是
言善哉善哉文殊師利汝今已得陀羅尼故
能如是說文殊師利言世尊非我得陀羅尼
何以故世尊若愚癡人得陀羅尼非佛菩薩
得陀羅尼何以故世尊愚癡凡夫得陀羅尼
得何等法所謂得我得衆生得命得丈夫得
斷得常得貪瞋癡得無明有愛五陰自身十
八界六內入六外人見分別不分別無分別
不分別行如是世尊愚癡凡夫得陀羅尼以
取相故分別不分別無分別不分別行如是

世尊愚癡之人得陀羅尼何以故若法愚癡
人得則非佛得非聲聞得非緣覺得非菩薩
得如是得言愚癡之人得陀羅尼何以故如
愚癡人虛妄心取非佛聲聞緣覺菩薩爾時
善住意天子語文殊師利童子言文殊師利
仁者若非得陀羅尼何故憍鈍文殊師利言
如是天子我實憍鈍何以故彼憍鈍行無人
能知如來聲聞緣覺菩薩天子若非憍鈍彼
人則是愚癡凡夫何以故以障礙故愚癡凡
夫貪著心行憍鈍慧須陀洹人障礙行說

尚貪心行何況愚癡凡夫之人如是天子如是得言我是憒鈍非得陀羅尼何以故乃至少物我不得故爾時會中五百比丘聞此法門不能信受生大怖畏棄捨而去自身將墮大地獄中爾時尊者舍利弗語文殊師利童子言文殊師利第九應當觀察此會大衆然後說法仁說如是甚深法門此衆會中五百比丘聞說如是甚深法門不能信受生大怖畏棄捨而去自身將墮大地獄中文殊師利言大德舍利弗汝莫分別乃至無有少物可得墮

於地獄何以故以一切法悉不生故大德舍利弗汝語我言應當觀察此會大衆然後說法大德舍利弗若善男子善女人依止我見依衆生見依壽命見依丈夫見雖復供養恒河沙等諸佛如來應正遍知及比丘僧一切樂具盡其形命如是供養若聞我說如是難解甚深法門一切世間聞不能信謂空無相無願寂靜不滅不生無有衆生壽命丈夫無我無常苦法空法捨而不受速墮地獄大德舍利弗若善男子若善女人聞此甚深難解

之法捨而不受生地獄中從地獄出依止我
見雖復供養恒河沙等諸佛如來應正遍知
而不得聞此甚深法爾時世尊讚歎文殊師
利童子作如是言善哉善哉文殊師利如是
如是如汝所說文殊師利如諸如來出現於
世聞此法門亦復如是如人證得須陀洹果
聞此法門亦復如是如人證得斯陀含果聞
此法門亦復如是如人證得阿那含果聞此
法門亦復如是如人證得阿羅漢法聞此法
門亦復如是何以故非依止我得證此法證

此法時無所得故爾時世尊即告尊者舍利
弗言舍利弗此諸比丘速出地獄得證涅槃
非彼愚癡凡夫之心有所得隨見疑中供
養如來舍利弗如是彼人以是因緣當得涅
槃非是餘人速得解脫何以故以不聞此甚
深法故舍利弗善男子善女人若得聞此甚
深法門一經於耳雖不信受墮於地獄而速
解脫非墮疑見非有所得爾時善住意天子
語文殊師利童子言文殊師利仁欲與我同
梵行耶文殊師利童子答言如是天子我欲

與汝同於梵行以汝梵行不取梵行不行梵
 行天子問言文殊師利以何意故如是說耶
 文殊師利答言天子若其取者彼得言行若
 其不取彼何所作天子若得梵行彼則有行
 若無所得彼何所作天子問言文殊師利仁
 此梵行為何所作文殊師利童子答言如是
 天子我非梵行何以故以此梵行則非梵行
 非梵行故如是得言我行梵行天子讚言善
 哉善哉文殊師利乃能如是以無障礙辯才
 樂說文殊師利言我有障礙云何汝言我無

障礙辯才樂說何以故一切有我所者
 皆有分別諸有分別皆有障礙爾時文殊師
 利童子復語善住意天子言天子若汝天子
 欲同梵行汝斷一切諸衆生命而不捉鐵不
 捉刀塊不捉杖等如是我汝同於梵行天子
 問言文殊師利以何意故如是說耶文殊師
 利問言天子所言衆生言衆生者汝意云何
 天子答言文殊師利所言衆生言衆生者乃
 至惟有名字想取文殊師利言如是天子殺
 取我想殺取命想殺取丈夫想天子問言仁

以何物殺取命想文殊師利答言天子以慧鐵殺彼般若鐵如捉如殺如捉不知如割不知天子應知彼問若殺我想殺衆生想如是名殺一切衆生如是我汝同於梵行爾時文殊師利童子復語善住意天子言天子若汝天子十不善業道集行一功染分平等行非是淨分平等行如是我汝同於梵行天子問言文殊師利以何意故如是說耶文殊師利答言天子若此染分平等彼平等平等行如是我汝同於梵行天子汝意云何何者染分

平等天子答言不作不貪文殊師利問言天子言淨分者是何法耶天子答言法性法界真如實際三解脫門此是淨分文殊師利問言天子汝復更能遮法界不答言不也文殊師利言如是天子以此意故我如是說若汝染分平等非淨分平等行如是我汝同於梵行爾時文殊師利童子復語善住意天子言天子若汝天子初始起心欲殺人時汝能頭上於先打者如是我汝同於梵行天子問言文殊師利以何意故如是說耶文殊師利答

言天子言殺殺者是何言語殺何物人天子當知殺言語者殺貪瞋癡我慢嫉妬幻偽諂曲取相想受如是名殺已說殺竟天子應知天子若有禪師貪欲心生已能離能令寂靜能令寂滅如是得言空無所有不著不取如是天子欲心生滅思量通達如是此心於何處生於何處滅於何處樂於何法樂如是觀察貪無所得於何處樂彼無所得於何法樂彼無所得若無所得彼則不取若不取者彼則不捨若不捨者如是彼則不取不捨如

是得言離欲寂滅如是乃至心如是說天子當知如是法殺即生即殺如是得言初始起心欲殺人時頭上先打如是名殺我意在此故如是說爾時文殊師利童子復語善住意天子言天子若汝天子於佛不染法僧不染如是我汝同於梵行天子問言文殊師利以何意故如是說耶文殊師利問言天子所言佛者汝云何解天子答言文殊師利如真如法界如是言佛又殊師利問言天子於意云何真如法界汝能染不答言不也文殊師利

言我意在此故如是說若汝天子於佛不染
如是我汝同於梵行復次天子所言法者汝
云何解天子答言文殊師利是離欲法如是
言法文殊師利問言天子於意云何彼離欲
法汝能染不答言不也文殊師利言我意在
此故如是說若汝天子於法不染如是我汝
同於梵行復次天子所言僧者汝云何解天
子答言以無爲故如是言僧聖聲聞僧是無
爲僧如是言僧文殊師利問言天子於意云
何彼無爲僧汝能染不答言不也文殊師利

言我意在此故如是說若汝天子於僧不染
如是我汝同於梵行天子若人得佛彼則染
佛若人得法彼則染法若人得僧彼則染僧
天子若不得佛如是彼人不染於佛若不得
法如是彼人不染於法若不得僧如是彼人
不染於僧何以故以佛法僧非彼人得以如
是故得言不染復次天子若人愛佛愛法愛
僧彼人染佛染法染僧若不得佛彼不愛佛
則不染佛若不得法彼不愛法則不染法若
不得僧彼不愛僧則不染僧天子若不染者

此貪欲句此不合句此示句此不實思量句
 不實句不實決定句不離欲句是故得言離
 欲寂滅天子我意在此故如是說若汝天子
 於佛不染法僧不染如是我汝同於梵行爾
 時善住意天子語文殊師利童子言甚為希
 有文殊師利乃能如是說甚深處我當報恩
 文殊師利答言天子汝莫報恩天子問言我
 今云何得不報恩文殊師利答言天子汝莫
 報恩如是天子汝莫報恩即是報恩天子問
 言文殊師利仁不報恩文殊師利答言天子

卷九

一三

如是如是我報恩非我報恩天子問言文
 殊師利以何意故如是說耶文殊師利答言
 天子愚癡之人作異異法愚癡之人作異異
 見愚癡之人作異異行以作異異法行見故
 得言報恩天子當知此非正行善男子也乃
 至少作或作不作是故得言不報恩者如佛
 世尊平等說法謂一切法皆悉不作亦不可
 作心平等不異取不異作是故得言不報恩
 者天子問言文殊師利仁住何法如是說也
 為住忍說為住法說文殊師利答言天子非

忍非法天子問言文殊師利於何處住如是說耶文殊師利問言天子幻化人身於何處住天子問言何處復有幻化人住文殊師利答言天子如真如住彼幻化人如是而住天子當知若如是說何處住說若如是者云何問言何忍何法天子當知忍惟有名名無住處法不移動亦不分別又無處所天子一切衆生於何處住於彼處住佛如是說何以故如佛所說如真如住一切衆生亦如是住真如不動如一切衆生真如如來真如不二真

如不異真如爾時善住意天子語文殊師利童子言文殊師利言沙門那沙門那者是何言語言沙門那文殊師利答言天子謂非沙門非婆羅門何以故天子若不著欲界不著色界不著無色界彼名沙門我如是說天子卷九若不漏眼若不漏耳若不漏鼻若不漏舌若不漏身若不漏意彼名沙門我如是說天子若不依止不依止說不依止處不依處說彼名沙門我如是說天子若無少處去無少處來不傷無傷彼名沙門我如是說如是句說十四

若非沙門非婆羅門爾時會中有五菩薩得四禪處得五神通時彼菩薩依三昧坐依三昧起未得法忍時彼菩薩自憶宿世曾殺母來曾殺父來殺羅漢來念彼殘業是故心熱不能獲得甚深法忍不能證入亦不在心依我分別心憶彼罪不能捨離是故不得甚深法忍爾時世尊知彼菩薩心可開曉以威神力加被文殊師利童子爾時文殊師利童子承佛神力從座而起整服左肩右手捉刀磨令使利疾走向佛爾時世尊即語文殊師利

童子作如是言汝住汝住文殊師利我先被殺極被殺已何以故文殊師利久遠已來何時有人生心殺我若生殺心即是殺已當爾之時彼五菩薩有如是念一切法如幻非我非衆生非命非丈夫非人摩那婆非母非父非阿羅漢非佛法僧非有此逆無造逆人何以故今此文殊師利童子黠慧深解細心思量聰明利智諸佛所讚得甚深忍已曾供養過去無量億那由他百千佛來文殊師利種種供養過去諸佛自在智慧善能通達一切

世尊

十五

諸法如法善說如實而說恭敬如來彼捉利
 刀疾走向佛佛言住住文殊師利我先被殺
 極被殺已若少有法和合聚集決定名佛名
 法名僧名母名父名阿羅漢有逆可取則不
 可離當知彼法無體非有非如非實不生不
 起空如幻化是故此法無人得罪無罪可得
 如是如是思量善知彼五菩薩如是知已即
 時獲得無生法忍既得忍已歡喜踊躍上虛
 空中去地不遠七多羅樹而說偈言
 一切法如幻 皆從分別起 此非決定有

一切法皆空	心不實分別	愚癡取我想
憶念過去世	作何等惡業	過去曾殺害
父母良福田	殺羅漢比丘	作極重惡業
彼惡業果報	我應受苦惱	今於善人所
聞法除疑悔	心不捨悔恨	憶持大名人
解已覺法界	何處無煩惱	佛善巧方便
方便知牟尼	以何方便力	淨衆生疑悔
諸法空無體	非佛非法僧	父母不可得
非有阿羅漢	非少有法殺	亦無少法墮
諸法平等相	如彼平等住	文殊大智慧

已證如是法 手捉利刀已 疾走向如來
 如利刀如佛 彼二無異相 非生亦非實
 此中無人殺

說此捉鐵刀法門之時周遍十方恒河沙等
 諸佛世界六種震動大地極動世界皆起時

彼十方諸佛世界諸佛世尊皆悉宋九現在現命十六

現住彼佛侍者各問其佛白言世尊是誰威
 力動此大地世界皆起彼佛答言善男子有
 佛世界名曰娑婆彼中有佛號釋迦牟尼如
 來應正遍知為衆說法彼娑婆世界有童子

菩薩摩訶薩名文殊師利於菩提道得不退
 轉捉利鐵刀智慧鐵刀疾走向佛以為開曉
 餘菩薩故有自在力自知堪能以是因緣令
 地大動爾時世尊依慧鐵刀如如法說令不
 可數衆生眼淨心解忍生欲行菩提爾時世
 尊以住持力住持擁護此衆會中初始發起
 微少善根虛妄分別種種分別諸衆生等令
 彼衆生不見鐵刀於此所說捉刀法門不闕
 不聽爾時長老舍利弗語文殊師利童子言
 文殊師利仁作極惡生死之業欲殺醫師此

業若熟於何處受文殊師利言大德舍利弗
皆作惡業我從生來不曾如是不知此行於
何處熟大德舍利弗何處幻人幻化業熟我
如是熟何以故以幻化人不生分別無虛妄
故大德舍利弗一切諸法皆如幻化復次大
德舍利弗我今問汝隨汝意答於意云何汝
有鐵刀可得不耶答言無也汝有惡業可得
不耶答言無也有得果不答言無也大德舍
利弗若無鐵無業無果報者何處業熟爾時
尊者舍利弗言文殊師利以何意故如是說

卷九

十七

耶文殊師利言乃至無有少業報熟何以故
以一切法無業無報無業報熟爾時彼處十
方世界諸來菩薩摩訶薩等白佛言世尊惟
願世尊以威神力加被文殊師利童子令至
十方諸佛世界如是說法如我來至此佛世
界爾時文殊師利童子語彼菩薩摩訶薩言
汝善男子各各觀察自佛世界時彼菩薩摩
訶薩等普往十方各各觀察自佛世界各各
自聞自佛世界文殊師利童子音聲各見文
殊師利童子住其佛前為諸大衆說此法門

各各皆有善住意天子問此法門各各皆有
 諸菩薩集皆有天子如是見已得未曾有皆
 悉歎言希有希有今此文殊師利童子此佛
 世界安住不動而一切處皆悉普現一切皆
 見爾時文殊師利童子為彼菩薩說如是言
 善男子譬如幻師善學幻術不動坐處示種
 種色如是菩薩善學般若波羅蜜幻如幻法
 中乃至一切諸佛世界隨心憶念皆悉普現
 何以故一切諸法皆如幻故如是應知爾時
 世尊語文殊師利童子言文殊師利如諸如

來出現於世聞此法門亦復如是如人證得
 須陀洹果聞此法門亦復如是如人證得斯
 陀含果聞此法門亦復如是如人證得阿那
 含果聞此法門亦復如是如人證得阿羅漢
 果聞此法門亦復如是聞此法門心生信解
 如坐菩提卷九聞此法門亦復如是十八文殊師利童
 子白言如是世尊如空如平等如無相如平
 等如無願如平等如真如如平等如法界如
 平等如實際如平等如平等如平等如解脫
 如平等如遠離如平等爾時文殊師利童子

白佛言世尊惟願世尊護此法門後世末世五十年時於閻浮提廣行流布令善男子若善女人咸得聞之爾時三千大千世界一切天人鼓樂出聲一切華樹皆悉敷榮出種種華於此三千大千世界皆悉震動放大光明遍滿世界蔽日月光令皆不現六十四億百千諸天歡喜踊躍生希有心住虛空中雨天華香末香塗香如雨而下鼓天妓樂一切合掌同聲唱言善說如是最勝妙法奇妙勝法今者文殊師利童子說此法門我等得聞於

此世界得生人中便為再見轉於法輪若有衆生聞此法門有能信解不驚怖畏當知是人必定不從小功德來若有衆生已曾供養過去諸佛乃得聞此甚深法門不驚怖畏爾時文殊師利童子白佛言世尊今有相現此十九經法門住持不滅能於後世五十年時於閻浮提廣行流布佛言如是如是文殊師利今有相現此經法門住持不滅文殊師利言如是世尊實作住持今此法門久住於世佛言文殊師利若三解脫門得證涅槃是實實語

此經法門後世末世五十年時於閻浮提廣
行流布是實實語文殊師利言若世尊說非
我非衆生非命非丈夫非人摩那婆非染非
淨是實實語此經法門後世末世五十年時
於閻浮提廣行流布是實實語若世尊說非
貪瞋癡非名非色非因非見非有非有識非
身非身記非心非心記非憶非憶處非發非
發處非色非受非想非行非識非眼非色非
耳非聲非鼻非香非舌非味非身非觸非意
非法非欲界非色界非無色界非斷非常是

實實語此經法門後世末世五十年時於閻
浮提廣行流布是實實語若世尊說非須陀
洹非須陀洹果非斯陀舍非斯陀舍果非阿
那含非阿那含果非阿羅漢非阿羅漢法非
辟支佛非辟支佛法非如來非如來法非力
非無畏非想非識非空非無相非無願非無
欲非本性非得非證非集非明非解脫非彼
岸非中間非此岸非涅槃非名非無說是實
實語此經法門後世末世五十年時於閻浮
提廣行流布是實實語若世尊說實無有人

相應不相應不合不散是實實語此經法門
後世末世五十年時於閻浮提廣行流布是
實實語如是世尊若前如來應正遍知過去
已說無有少法衆生得脫無得涅槃非有衆
生非有法生非有法滅非失非動如過去說
如是未來如是現在皆如是說二十是實實語此
經法門後世末世五十年時於閻浮提廣行
流布是實實語如是世尊若說此法無少法
說非語非說非言語說非畢竟說非後時說
非現前說非響聲說非數數說非此法說無

一字說非此法說無人現在聽無人未來聽
無人得解脫是實實語此經法門後世末世
五十年時於閻浮提廣行流布是實實語若
世尊說此戒非戒非戒果非三昧非三昧處
非般若非般若根智非解脫非解脫智是實
實語此經法門後世末世五十年時於閻浮
提廣行流布是實實語若世尊說菩薩法中
非布施捨非戒守護非忍修習非精進發非
禪決定非般若行非求菩提非實行轉非得
菩提非得力非得無畏非根非正非轉法輪

非解衆生非言語說是實實語此經法門後
 世末世五十年時於閻浮提廣行流布是實
 實語說此法時於此三千大千世界六種震
 動爾時彌勒菩薩摩訶薩白佛言世尊以何
 因緣於此世界如是卷九大動世尊即告彌勒善
 薩摩訶薩言彌勒汝今莫作是語二十一少信衆生
 聞不能解則生怖畏彌勒菩薩摩訶薩白佛
 言世尊如來若說多人得力多所利益安樂
 天人佛言彌勒過去已有七十四億那由他
 百千諸佛於此地處說此法門文殊師利童

子菩薩與善住意天子相隨問答論義彌勒
 菩薩摩訶薩白佛言世尊文殊師利童子菩
 薩與善住意天子相隨聞此法門其已久如
 於何佛所聞此法門佛言彌勒過去久遠七
 阿僧祇百千劫際有佛出世號曰普華師子
 遊步勝功德集如來應正遍知如是善男子
 於彼佛所聞此法門說此法時恒河沙等衆
 生發阿耨多羅三藐三菩提心彼二億人得
 不退忍彼二億人得離垢法眼世尊既說此
 法門已時諸比丘文殊師利童子菩薩善住

意天子并諸天人阿修羅乾闥婆等聞佛所說皆大歡喜

善住意天子所問經卷下

翻譯記

夫法留正像惟聖是依季行於此非賢豈伏
三藏法師毗目智仙出自烏菴利利王種幼
履慈蹤長躡悲跡攝化群迷誠惡導善常為
衆生不請之友執此法燈照彼昏暗魏皇都

永樂北藏

善住意天子所問經

第二二册

鄴崇福以資興和二年歲次實沈佛法加持
出此經典名善住意天子所問建午閏月朔
次丁丑戊寅建功乙巳畢功助譯弟子瞿曇
流支對譯沙門曇林之筆庶俟存道故法之
賢如實印記示令不惑耳

音釋

卷九

二五

頭陀

梵語也亦云杜多此云修治又云抖擻謂抖擻貪欲瞋恚愚癡而修治淨

也行

抖擻抖音斗擻音史蒙鈍蒙音莫鈍音徒切正作憍愚

也

數數並音朔頻數也

翻譯記

永樂北藏

善住意天子所問經

第二二册

烏長長直良切烏烏聶尼輒切登也業音業

烏長長國名也

烏聶登也

業地名